

**Regional News Unit AIR Aizawl
Thursday, December 19, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Governor Dr. Hari Babu Kambhampati an ICAR - Indian Institute of Oil Palm Research hotute chu Mizoram Oil palm tam zawk a thar chhuah theih nana pawimawhte a sawipui.**
- **Bana Kaih Scheme hnuai tanpuina Loan pekna atan Mizoram Sawrkar leh a Bank thlunzawm ten inremna an ziak.**
- **Mizoram State Load Despatch Centre chuan ram pum huap intihsiaknaah, Emerging LDC Category ah 4th LDC Excellence Awards lawmman pakhatna a dawng.**
- **Prime Minister Narendra Modi leh Netherland Prime Minister Dick Schoof ten thawh hona tha leh thuk zawk an neih thei dan tur an sawi dun.**

<><><>

OIL PALM

Larsap Dr. Hari Babu Kambhampati chuan nimin khan ICAR - Indian Institute of Oil Palm Research hotute kawmin Mizoram Oil palm tam zawk a thar chhuah theih nana pawimawhte a sawipui.

Indian Council of Agricultural Research - Indian Institute of Oil Palm Research, Pedavegi, West Godavari, Andhra Pradesh atanga lokal Dr. K. Manorama, Principal Scientist, Dr. G. Ravichandran, Principal Scientist leh Dr. G. Somasundaran, Senior Scientist-te nen Raj Bhavana an inkawmnaah Larsap chuan oil palm chingtute'n harsatna an tawh hrang hrangte leh a chinfel dan turte a sawipui a, Oil palm thar chhuah kawnga theihna nasa tak nei Mizoram theihtawp chhuaha hmalak a tul thu sawiin, hemi kawnga thiamna nei ICAR-IIOPR hotute chu oil palm chingtute harsatna leh mamawhte ngun zawka ngaihvenpui tur leh, ICAR Research Complex for NEH Region, Mizoram Centre, Kolasib kaltlanga chak zawka hmalak a nih theih nana tan la turin a chah a ni.

He hunah hian ICAR- Indian Institute of Oil Palm Research hotute'n Mizorama hma an lak tawh dante Larsap hi an hrilh a, Mizoram chu NE State zinga oil palm chin tamna ber a nih mek thu leh potential area hectare sing 6 atanga sing 7-a zau a neih thu an sawi a ni.

<><><>

GOVERNOR

Larsap Dr. Hari Babu Kambhampati chuan mipuite'n an tana hamthatna awm an hriat chian lehzuala an chhawr tangkai ngei theih nana tan lak a tul thu a sawi.

Nimina Aizawl South-III bialtu MLA Pi Baryl Vanneihsang'i'n Centrally Sponsored Scheme, Social Security Scheme leh pawimawh dangte mipuite'n an chhawr tangkai thei dan tur a sawipui naah he thu hi Larsap chuan a sawi a.

Larsap chuan amah ngei pawh MLA leh MP a lo nih tawh thin thu leh mipuite rawngbawl sak chu dah pawimawh bera neih a tul thu a sawi a ni.

Aizawl South-III bialtu MLA Pi Baryl Vanneihsang chuan sawrkar laipui kaltlanga mipuite tana hamthatna duan hriat chian zel a duh thu leh mipuite'n an hlawkpui theih nana tanlak a tum thu Governor hi a hrilh a. He hunah hian Social Security Scheme pawimawh tak tak zinga mipuite awlsam taka an inziahlaha an chhawr tangkai theih tur, kum tin cheng 436 thawha engvang pawha thihna a thlena life insurance cheng nuai hnih thleng dawn theihna Pradhan Mantri Jeevan Jyoti Bima Yojana (PMJJBY) leh cheng 20 thawha accident laka life insurance cheng nuai hnih thleng dawn theihna Pradhan Mantri Suraksha Bima Yojana (PMSBY) chungchangte, Mudra Scheme, Solar Rooftop Scheme leh Centrally Sponsored Scheme pawimawh dangte leh hemi kawnga hmalak theih dante an sawidun a ni.

<><><>

CM

Nimin khan Chief Minister Pu Lalduhoma hovin Minister pawimawh leh sawrkar mi pawimawh ten Higher & Technical Education hmachhawp sawiin CM Conference Hall ah an thukhawm a.

Meeting ah hian NIT Mizoram campus sak meka forest clearance chungchang te, New Education Policy 2020 anga Mizoram State University din dan tur te, Mizoram Engineering College, Pukupui, a taka kal thei tura buatsaih dan turte bakah Mizoram Polytechnic, Lungleiin harsatna a tawh mek te an sawi a ni.

Mizoram State University hi kum 2035 a lo neih fel hman a ngaih avangin 16th Finance Commission chungah sum ruahman tum a ni a. Chutiang bawkin Mizoram Engineering College kalpuina tur pawh hi 16th Finance Commission ah bawk ruahmanna siam niin, kum 2026 Academic year atanga class kalpui tuma inbuatsaih ni se, an ti bawk.

<><><>

MIZORAM SIGNS MoU WITH PARTNER BANKS

Chief Minister Pu Lalduhoma kaihruiin Bana Kaih Scheme hnuuia Progress Partners te loan pekna atan Mizoram Sorkar leh Partner Banks State Bank of India, Mizoram Rural Bank Ieh Mizoram Co-operative Apex Bank Ltd. te chuan inremna an ziak a.

Nimina Chief Minister Conference hall a hun hmanah hian Chief Minister hian Chief Minister's Bana Kaih Innovation Challenge an hawng a, Pu Lalduhoma chuan Bana Kaih Scheme chu a taka kalpui ani thei chu lawmawm atih thu sawiin Bank te nena thawh dun ngai a nih angin an thawhpui tur bank te nena inremna an ziak thei chu lawmawm atih thu sawiin hmasawna kawng dikzawh tirtu hmalakna anih ngei a beisei thu a sawi.

Inremna hi Mizoram Sorkar aiawhin Planning & Programme Implementation Department Secretary Pu Lalmalsawma Pachuau in a ziak a, SBI aiawhin Regional Business Office Regional Manager Pu Hubert S.Z Khobung chuan inremna a ziak a, MRB aiawhin Pi Sheryl L Vanchhong, Chairman, MRB chuan a ziak a ziaikin MCAB aiawhin Pu A. Lallungmuana, Chief Executive Officer chuan a ziak a ni.

VC... John Vanlalchhuanga Akashvani News Aizawl

Chief Minister Pu Lalduhoma'n nimina Bana Kaih Innovation Challenge a hawn hnuaiah hian intihsiakna hrang hrang a awm dawn a, Sawrkar department hrang hrang ten project thehlutin Innovation Challenge intihsiakna neih tur a ni a, District innovation challenge hnuaiah hian Mizorama District zawng zawnga DC te kaihhruaiin Tlawmngai pawl, Local Council leh Village Council bakah Self Help Group leh pawl hrang hrang te a tel theih dawn a, Investor Challenge hnuaiah hian ngaihtuahna thar seng a, thil tha leh tangkai duang chhuak tur te an tel thei dawn a, Mizoram tana danglamna thlen duh tan a tel theih vek a ni. Intihsiakna hrang hrang kalpui dan tur kimchang hi Planning & Programme Implementation Department chuan an la tichhuak leh dawn a ni.

<><><>

MIZORAM CSR CELL

Nimin khan CSR Cell te chu an chairman Adviser to Chief Minister Pu TBC Lalvenchhunga hovin a pisaah an thukhawm a, an hmalak tawhna te thlirletin, hmachhawp an neih te an sawiho.

Tun thla ni 10 khan CSR Cell hian I&PR Conference Hall-ah Mizorama CSR fund dil thei registration nei leh neih tum pawl, sawrkar department, agency leh Deputy Commissioner zawng zawng te sawmin awareness campaign a buatsaih a. Khami tuma ngaihventu an tha tawk nia an hriat thu leh lawmawm an tih thu vawiin thutkhawmah hian sawi a ni a. Awareness nasa zawk kalpui dan tur an ruahman belh a, nakkum lama CSR Conclave lian tham buatsaih dan tur pawh an sawiho a ni.

CSR fund dil thei registration nei society, sawrkar agency leh department te leh CSR Fund pe thin corporate aiawhte inthlun zawmna tur online CSR matchmaking platform an duan mek pawh an peih fel tep tawh thu thutkhawmah hian tarlan a ni a. Tarlan tawh thin angin India ramah CSR Fund tam tham tak kumtin a awm reng a. A dil thei leh dil thiam Mizoramah an tlem si avangin Mizoram chu CSR Fund dawng tlem ber state a ni thin a. Tam zawka CSR Fund hmuh a nih theih nan sawrkar chuan CM office-ah CSR Cell hi a din a. He cell hian CSR dil thei tura registration neih dan te, registration nei ten awlsam taka an dil theih dan tur zirtir te, proposal siam dan te, CSR pe thei Company te nena an inthlunzawmna tur hmalakna te chak takin a bawhzui mek a. Hemi lama tui leh tihumte tan CSR Cell hi engtiklai pawha dawr theih reng a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnudar 2 leh a chanve-ah Chanchinthar puan leh a ni ang.

<><><>

SLDC EXCELLENCE AWARD 2024

Power & Electricity Department hnuaia Mizoram State Load Despatch Centre chuan India ram pum huap intihsiakna, Grid India leh Forum of Load Despatcher in a buatsaih, Emerging LDC Category ah 4th LDC Excellence Awards lawmman pakhatna a dawng.

P&E Minister Pu F. Rodinglana chuan he lawmman dawn a nih theihna tur a rim taka thawktu zawng zawng te chungah lawmthu a sawi a, ram leh hnam tan theihtawp chhuah chhonzawm zel turin duhsakna a hlan bawk a ni.

Lawmman hlanna hi National Power System Conference, IIT Indore ah buatsaih niin Power & Electricity Department aiawhin P&E Engineer-in-Chief Pu H. Zonunsanga'n a dawng a. He intihsiaknaah hian India ram pumpui chu Category thum ah then niin, Emerging LDC Category, State leh UT 13 awmnaah lawmman pakhatna 4th LDC Excellence Award 2024 hi Power & Electricity Department Mizoram SLDC hnenah hlan a ni a, P&E Engineer-in-Chief Pu H. Zonunsanga chuan lawmman an la chu lawmawm a tih thu Akashvani a hrilh a ni.

<><><>

PM

Prime Minister Narendra Modi leh Netherland Prime Minister Dick Schoof te chuan nimin khan tui, agriculture leh health lam a thawh hona tha leh thuk zawk an neih thei dan tur an sawi dun.

Ram pahnih Prime Minister te hi phone hmang a in dawr in, hruaitu pahnih te chuan India leh Netherland in kar ah inrintawn na leh thawhhona tha tak an nei thei thin chu lawmawm an tih thu an sawi bawk. Tun ai a kalphung tha zawk a insumdawntawwna, venhimna, thil thar siamchhuah kawngah leh green hydrogen leh semi conductor te hi mumal tak leh thawh hona tha tak nen a kalpui an tum thu an sawi bawk a, Ram Hruaitu pahnih te chuan a ram mipui te zirna leh nunphung inzir tawwna te chu an ngaih pawimawh thu sawiin, an ram chung leh khawvel huap pawh a hmasawn na chungchangah an ngaidan te sawi dun in, remna leh muanna a lo awm zel theih nan a an hmalak tum dan te an sawi bawk a ni.

<><><>